



لما تموت الأحلام

من سنتين أو يمكن أكثر كنت بحارب علشان حبك
كنت بفكر اعمل إيه علشان اقدر أخطف قلبك
لكن الدنيا غريبه بجد تدى قليل تاخذ أكثر
تدى المر بطعم السكر واللي يسبها هو الأشر
وانا مش شاطر قلبي اتعلق عقلي يزغق وانا محتار
عقلي قصاد قلبي ونبضه تعب وانهار قلبي اختار
اختار حبك اختار قلبك قال لنفسه هافضل جنبك
هارضى لقلبي يعيش فى النار مادام النار دى من حبك
بس سؤالي اللي في بالي بعد ده كله ليه سبتيني
ليه بعيتيني ليه كسرتي اللحم الوردي ليه نستيني
صحيح انا حبي كان على قدي بس بحب
صاحب قلب يعني بقدر معنى الحب
وان كان حد قالك ابعدى ده مش جد
ليه كان بعدك هو الرد وبنيتي بينا أكبر سد
صعب بجد كان مطلوب إيه مني قوليلي
كنتي دليلى كنتي النور في العتمة كنتي سييلي
قمري في ليلي كنت بخاف م الهوا ليقرب منك
أيوه بحبك أيوه بغير كان قلبي عايش عندك
واكمنك ملكاتى وبايدك دبحاتي وانا مستسلم
بتكلم من غير صوت وبموت والروح تتألم

جرحك بيلعلم أثره ما بيروح كفياني جروح
لو كل الناس جرحتنى جرحك انتى بروح
وانا جرحى كان مفتوح وبينزف أحلامي
قدامى وأنا واقف متسمر من قسوة أيامى
متدمر مستغرب راح فىن الحب اللي ماليكي
وعنيكي كانت بتدمع لما تشوفنى وإيديكي
كانت تتلهف على ايدي وانتى في ناري تزيدى
ماسكه ويريدى وبتتحكمي فيه كيف ما تريدى
فكيت قيدي فوقت وفاق قلبى من نومه
وعرف يومه وعرف مين عيشه فى همومه
وانا ما هالومه أيوه صحيح انا وانت تعبنا
واتعذبنا واتبهدلنا ويقول فعلا كتر خيرنا
م اللي جرائنا اتعلمنا إن الحب ده عاوز خبرة
وقلوب قادره تحب على كل اللي بيحصل صبره
عاذره اللي تحبه وتحافظ على قلبه ماتخونه
تستحمله في جنونه ما تعيش لحظة بدونه
تشاركه فرحه وشجونه واستنى معايا الجاى
بعنيكي هاتشوفي الأيام راح تبقى إزاي
وازاي بنحس لما تموت الأحلام وابصم بالعشرة
بكره هاتتمنى بجد لو كنتي صنتي العشرة